




Cun biebin 30 participontas e participonts ei il cuors da romontsch staus in grond success.

FOTO MAD



Susanna Heckendorn sesenta fetg bein ella vischnaunca da Tujetsch e vul perquei era emprendre romontsch.

«Ussa essas era vus (in tec) Tuatschins ed unics»

Quest'jamna ha giu liug igl emprem cuors da romontsch per hosps e possessurs da secundas habitaziuns a Sedrun. Oz va il cuors, ch'ei staus in grond success, a fin.

SUSI ROTHMUND/FMR

Igl interess pil cuors da romontsch sursilvan a Sedrun ei staus fetg gronds. 30 persunas ein stadas a scola quest'jamna tier las scolastas *Tatjana Curschellas*, *Irina Monn* e *Carla Flury-Nay*. Ellas ein vegnidas instruidas en duas gruppas per entschiveders ed ina per avanza. Igl impuls d'organisar in cuors da romontsch era vegnius ord las retschas dalla Cuminonza d'interess dils possessurs da secundas habitaziuns da Tujetsch. Il gerau *Daniel Schmid* ha organisau il cuors a cuorta vesta e sco el di, duei ei era dar ina cuntinuaiziun. Schmid ei fetg cuntents dil grond interess pil cuors e sa era s'imaginar da vender tals turistic.

Cuors divertent

La FMR ha astgau visitar ier avonmiez di il cuors dils avanza cun la scolasta Iri-

na Monn. Ses scolars fagevan gia la parera da capir in tschuat e levau adina puspei era saver la versiun tuatschina. Ei seigi nuota sempel d'emprendre sursilvan e tuatschin enina. Ils participonts eran denton zun interessai e havevan tschaffen. Negin ha giu retenientschas da discuorer romontsch. Ella veta da mingadi han denton aunc biars talas e lu midan spert puspei vi el tudestg. Participontas e participonts han denton cumprovau ch'ei san perfin cantar romontsch. Ensem culla scolasta han ei cantau «unics» da *Pascal Gamboni* ed empriu tgei ch'ils plaids dalla canzun muntan. Irina Monn ha declarau ier: «Sunter nies cuors astgeis vus era dir che vus seigies (in tec) unics e Tuatschins.» Ella ha instruiu a moda luca e ludica cun giugs da rollas e s'imaginond situaziuns realas. «Ier havein nus fatg sco sche nus fussen ell'ustria, quei

ei stau interessant e risadas», ha il participont *Jürg Fraefel* raquintau.

Emprender a moda luca

Per l'instrucziun nezegian las treis scolastas il mied «En lingia directa 1». Sco igl ei stau d'udir al cuors da pliras varts, para quei mied denton d'esser bravamein anti-quaus ed ei pudessi tuttavia vertir entzatei pli modern ed adattau al temps. Era sch'ei dat pensums da casa voluntaris ei l'entira intrucziun a Sedrun plitost luca. Naturalmein ch'ei drova empau grammatica e reglas, mo il dialog dominescha e quei schazegian participontas e participonts. Tenor *Tatjana Curschellas* san ins mussar dabia enteifer ina jamna, con che stetti la finfinala en memoria seigi in'otra caussa.

«In lungatg viv e cauld»

Susanna Heckendorn da Bülach ei ina dallas participontas dil cuors da romontsch.

Dapi gl'atun vargau han ella e sia famiglia affittau sur onn ina habitaziun da vacanzas a Rueras e passentan leu dabia temps. Il romontsch plai extrem bein ad ella: «Jeu sesentel fetg bein si cheu ed il romontsch ei ina part da Tujetsch. Il lungatg s'auda tier la cultura - igl ei in lungatg viv e cauld.» Siu giavisch ei da saver leger e capir quei che stat ella gasetta locala Tuatschina e da saver discuorer culs indigens romontsch, era sch'ella vegni per in temps aunc a rispunder per tudestg. «Saver discuorer quei lungatg ei per mei il pli impurtont, skriver ha per secunda prioriad», declara *Susanna Heckendorn* che ha frequentau la jamna vargada il Cuors romontsch sursilvan intensiv a Glion. Dapi la primavera gauda ella era l'instrucziun da sursilvan durtont in cuors dalla scola dalla Migros a Turitg. Pil cuors a Sedrun anfla ella massa lauds e di, ch'ei seigi era ina buna caschun per empustir contacts.

Empriu bia dil coiffeur

Hanspeter Kuster ha ina feglia ch'ei maridada cun in Tuatschin ed ei dapi 20 onns adina puspei ella val. Sco igl um da 75 onns di, mondi ei gia detg bein da leger romontsch, cul tschintschar hagi el denton aunc empau problems. El discuro cun el ei semessau ch'el capescha quasi tut, ha denton retenientschas da paterlar romontsch. Era *Jürg Fraefel* da Stäfa - sper il lag da Turitg - ei dapi il 2005 adina puspei d'entupar a Tujetsch. El posseda ina casa a Surrein/Sedrun e discuroa bugen romontsch. *Fraefel* sesenta bein e beinvegnius ella val, empau jasters vegni el denton adina a restar. Entschiet ad emprendre romontsch ha el culs vischins, sch'ils discuro daventien pli profunds, midien ei denton vi tiel tudestg. Il pli bia hagi el saviu emprendre durtont schar tagliar cavels il coiffeur *Arthur*.



Il gerau responsabel, Daniel Schmid en discuors culla scolasta Tatjana Curschellas.



Irina Monn (sen.) ei ina dallas scolastas che ha instruiu al cuors da romontsch che ha giu liug questa jamna a Sedrun.

FOTOS SUSI ROTHMUND

SURSELVA

Questiunari davart il futur dil mund da lavur en Surselva

Co vul la gliued en Surselva viver e lavrar egl avegnir? Per sclarir quella damonda ha la Regiun Surselva tarmess in questiunari en las casadas dalla regiun. Ins vul sclarir l'opiniun dils indigens naven da 16 onns, dils possessurs d'habitaziuns secundaras e d'altres persunas che s'interessan per la Surselva. Las damondas principalas ein: Co lein nus viver e lavrar egl avegnir en Surselva e co sa la regiun daventar pli attractiva? Tenor il menader dil project che senumna «Avegnir Surselva» e sviluppader regiunal *Ruedi Büchi* ei la finamira da sviluppar mesiras ch'ins sappi discutir cun las vischnauncas. «Impurtonts ein buca mo ils projects economics davart il svilup dil turissem. Sco organizaziun vulein nus era risguardar la cultura e la scola. Ultra da quei vulein nus collaborar cun las uniuns.» Il questiunari che ha per mira da rimnar varga 20'000 opiniuns ei in emprem pass. En in secund pass vegn ins a formar gruppas da lavur. En ina fasa finala vegnan las ideas e visiuns lu concretisadas. (rtr/fmr)

CORRIGENDA

Concert d'orgla a Mustér

Ils 28 da fenadur 2021 ha la Fundaziun Medias Rumantschas publicau ina prevista sin in concert d'orgla dalla claustra da Mustér ils 31 da fenadur 2021. Deplorabamein eis ei seschluitau viaden in sbagl. Il concert dall'orgla nova dalla claustra ha numnadamein buc liug allas 20.00 uras, mobein allas 16.00 uras. La FMR sepers-tegia per quella indicaziun sbagliada - mo giavischia tutina in bi e solemn concert. (fmr)